

18
19
20
21
22
23
24
25
26
27
28
29
30
31
32
33
34
35
36
37
38
39
40
41
42
43


紅藕花軒


96273

392

883


4





紅藕花軒泉品卷八

宋正品上



右宋通元寶錢宋太祖鑄四品皆徑七分重一錢面背
肉好周郭文曰宋通元寶兼篆隸八分三體形製文字

皆倣唐開元通寶錢一光幕一背穿上有月形其二背穿下有星點宋史太祖本紀太祖啓運立極英武睿文神德聖功至明大孝皇帝諱匡胤姓趙氏涿郡人也建隆元年春正月乙巳大赦改元定有天下之號曰宋又食貨志蓋自五代以來相承用唐舊錢其鑄者鮮太祖初鑄錢文曰宋通元寶凡諸州輕小惡錢及鐵蠟錢悉禁之李燾通鑑長編建隆中鑄宋通元寶歐陽修歸田錄國家開寶中所鑄錢曰宋通元寶至寶元中則曰皇宋通寶近世錢文皆著年號惟此二錢不然者以年號有寶字不可重故也董譜作宋元通寶鄧元錫函史云

宋元通寶錢輕重一準唐之開元光幕外星指文

欽定西清古鑑錢錄按唐開元錢舊唐書言歐陽詢制詞曰開元通寶俗讀曰開通元寶然則此錢亦當自上及下讀之而史緣淳化以下諸錢多右旋讀故併此錢稱爲宋通元寶也




右宋通元寶鐵錢宋太祖鑄徑六分半重一錢形製與銅品無異其文宋元二字楷書通寶二字篆體帶八分

宋史食貨志蜀平仍聽用鐵錢開寶中詔雅州夏縣置
監治德禁銅錢入兩川據此則宋初川省皆用鐵錢蓋
倣蜀製也




右太平通寶錢宋太宗鑄二品皆徑七分重一錢面背
肉好周郭文曰太平通寶楷書含篆隸三體太平自上
而下讀之通寶自右而左讀之一光幕一背穿左有月
形宋史太宗本紀太宗神功聖德文武皇帝諱炅初名

匡義卽位之二年改今諱元年大赦改是歲爲太平興
國元年食貨志初太宗改元太平興國更鑄太平通寶
錢吉金所見錄太平通寶錢又一品背左爪春草堂錢
式圖載一品月形在下云相傳可辟兵火瘟瘧嘉蔭籜
論泉截句紀元四字文難備興國崇教勒太平平得江
南詢鑄法開元舊料冶初成自注平江南詢舊鑄法惟
饒州永平監用開元錢料最善翰案宋錢自太平通寶
已下小平錢皆準宋通元寶之式徑重好郭後不復具
其有大小異形者乃詳書以示別焉






右龍文太平通寶大錢徑一寸一分重三錢一分面背
 肉好周郭文曰太平通寶分楷書背為龍戲蛛象此品
 諸譜不載翰案周通錢背文有龍鳳者有三雀銜花者
 宋受周禪承用舊制太宗朝仿之而為此大錢歟故附
 著之



右淳化元寶錢宋太宗鑄文曰淳化元寶自上而右旋
 讀真行草三體書案太宗以太祖開寶九年丙子即位
 為太平興國元年甲申改元雍熙丁亥改元端拱庚寅
 改元淳化宋史食貨志淳化改鑄又親書淳化元寶作
 真行草三體後改元更鑄皆曰元寶而冠以年號又律
 歷志淳化二年詔定秤法以御書三體淳化錢較實二
 銖四案為一錢者二千四百得十有五斤為一秤王應

麟玉海自後改元必更鑄年號爲文景德權衡式以御
 書三體較定趙德麟侯鯖錄前世錢文未有草書者淳
 化中太宗始以宸翰爲之既成以賜近臣王元之謫商
 於有詩云謫官無俸突無煙惟擁琴書盡日眠還有一
 般勝趙壹囊中猶貯御書錢王禹偁小畜集有謝賜御
 書字樣錢表魏了翁名義攷錢文改元更鑄自宋太宗
 始翰案前蜀王建有永平通正天漢光天四錢王衍有
 乾德咸康二錢皆改元更鑄在宋太宗前此猶僭偽之
 朝也宋前廢帝有永光景和二錢唐高宗有顯慶乾封
 二錢則改元更鑄其來渺矣




右至道元寶錢宋太宗鑄文曰至道元寶真行草三體
 書案淳化六年改元至道宋史食貨志至道二年治禁
 匠費用錫官益其價市之以給諸路鑄錢玉海至道二
 年十月己未池州新置錢監賜名永豐吉金所見錄至
 道真書元字次畫亦右挑



右咸平元寶錢宋真宗鑄文曰咸平元寶真書含隸體
 宋史真宗本紀真宗應符稽古神功讓德文明武定章
 聖元孝皇帝名恆咸平元年食貨志咸平四年作永利
 監鑄錢陸友仁研北雜志魏文靖云咸平錢十文重一

兩




右咸平元寶小錢徑六分重四分文同前品寶字帶篆
 體案咸平錢十文重一兩一文當重一錢此品輕小不
 合官式或當時私鑄耶





右景德元寶錢宋真宗鑄文曰景德元寶真書商輅等
 續資治通鑑綱目戊戌真宗皇帝咸平元年甲辰景德
 元年宋史食貨志景德四年詔曰鼓鑄錢刀素有程限
 憫其勞苦特示矜寬自今五月一日至八月一日止收

半功本司每歲量支率分錢以備醫藥十二月令鑄匠
每旬停作一日又云至道中鑄錢八十萬貫景德中增
至一百八十三萬貫李日華紫桃軒雜綴真宗教藩邸
臣書以虞世南之字法今觀景德祥符諸錢俱作虞體
右祥符元寶錢宋真宗鑄文曰祥符元寶真書案真宗
景德五年戊申改元大中祥符續資治通鑑綱目戊申
大中祥符元年春正月有天書見於承天門遂大赦改






元宋史食貨志大中祥符七年知益州凌策言錢輕則
易齎鐵少則鎔者鮮利於是詔減景德之制其見使用
舊錢仍用如故歲鑄錢總二十一萬貫諸路錢歲輸京
師四方由是錢重而貨輕春草堂錢式圖是年爲大中
祥符元年然鑄錢無六字之文乃曰祥符元寶亦有通
寶者




右祥符通寶錢宋真宗鑄文曰祥符通寶真書凡二品

字體小異玉海祥符元年六月癸巳賜輔臣新鑄御書
祥符通寶錢董譜大中通寶宋真宗鑄祥符元寶同上
翰案今見有大中通寶錢乃明太祖所鑄宋之大中通
寶錢則未之見而祥符通寶一品可補董譜之缺云





右天禧通寶錢宋真宗鑄文曰天禧通寶真篆二體書
案大中祥符十年丁巳改元天禧宋史食貨志大中祥
符後銅坑多不發天禧末鑄一百五萬貫春草堂錢式

圖或曰天禧已有篆書惜未一見翰案天禧錢真書
多有之篆書者甚少余得一枚較真書錢微薄又案天
禧六年壬戌改元乾興諸譜並無乾興錢嘉蔭移論泉
截句注案續通鑑長編乾興中鑄乾興通寶錢今未見




右天聖元寶錢宋仁宗鑄文曰天聖元寶真篆二體書
宋史仁宗本紀仁宗體天法道極功全德神文聖武睿
哲明孝皇帝諱禎初名受益續資治通鑑綱目癸亥仁

宗皇帝天聖元年歸田錄時章獻明肅太后臨朝議者謂撰號取二人聖悅太后爾張端義貴耳集云於文取二聖人故當時有二人口耳之讖沈括夢溪筆談國初平江南鑄錢七萬貫自後稍增廣至天聖中歲鑄一百餘萬貫熙寧後歲鑄鐵錢六百餘萬貫錢志新編自後宋錢每有篆文翰案宋通鐵錢及咸平小錢皆含篆體天禧錢真篆並行則篆書宋初已有天聖後乃盛行爾




右明道元寶錢宋仁宗鑄文曰明道元寶真篆二體案仁宗天聖十年壬申改元明道歸田錄及玉海謂議者明字於文爲日月並時母后臨朝也張端義貴耳集云仁宗劉后並政明道曰日月全道宋史夏國傳元昊避父諱德明諱稱宋明道爲顯道



右景祐元寶錢宋仁宗鑄文曰景祐元寶真篆二體案仁宗明道三年甲戌改元景祐宋史食貨志景祐初三

司以江東福建廣南歲輸緡錢合三十餘萬易爲金帛
錢流民間許申爲三司度支判官建議以藥化鐵與銅
雜鑄輕重如銅錢銅居三分鐵六分皆有奇贏亦得錢
千費省而利厚詔申用其法鑄於京師



右皇宋通寶錢宋仁宗鑄文曰皇宋通寶真篆二體又
有緣潤而字細者亦真篆各一品案景祐五年戊寅改
元寶元文獻通考國朝錢文皆用元寶而冠以年號爲
文及改元寶元文當曰寶元元寶詔學士議因請改曰
豐濟元寶仁宗特命以皇宋通寶爲文






右皇宋通寶小錢徑六分重七分文曰皇宋通寶篆書
陸南軒續泉志皇宋錢有大小三品自七分至一錢九

分翰案此錢較前品爲小續泉志所謂重七分者也



右康定元寶鐵錢宋仁宗鑄徑七分弱重一錢六分文
曰康定元寶真書元寶二字含篆隸體案仁宗寶元三
年庚辰改元康定清白士集元號略三康定宋仁宗二
月改元至二年十月歐陽修歸田錄及王應麟玉海謂
好事者以爲康定如諡法續資治通鑑綱目庚辰康定
元年十二月鑄當十大錢以助邊費錢志新編按此錢


大小厚薄與大崇寧同小者亦少吉金所見錄有仁宗
康定元寶鐵錢云按仁宗寶元三年改元康定次年卽
改元慶歷故此品不多見嘉蔭移論泉截句自注康定
錢今僅見有鐵錢元字右挑翰案董譜宋錢不載康定
蓋亦未見今所得亦鐵錢比於吉光片羽矣



右慶歷重寶大錢宋仁宗鑄二品一徑九分重一錢五
分一徑八分重二錢文曰慶歷重寶真書一自上而下

順讀一自上而右環讀案仁宗康定二年辛巳改元慶
曆宋史食貨志慶曆五年軍興陝西移用不足始用知
商州皮仲容議采洛南縣紅崖山號州青水冶青銅置
阜民朱陽二監鑄錢既而陝西都轉運使張奎知永興
軍范雍請鑄大銅錢與小錢兼行大錢一當小錢十又
云陝西復采儀州竹尖嶺黃銅置博濟監鑄大錢因勅
江南鑄大銅錢又去時興元府西縣增置濟遠監而韶
州天興銅大發歲采二十五萬斤詔卽其州置永通監
後濟遠監廢儀州博濟監既廢復置董譜有慶曆通寶
宋仁宗鑄翰案通寶者蓋小平錢未見今見重寶二品

蓋當十也





右慶曆重寶大鐵錢宋仁宗鑄徑一寸重三錢文曰慶
曆重寶真書宋史食貨志敘張奎范雍請鑄大銅錢下
云又請因晉州積鐵鑄小錢及奎徙河東又鑄大鐵錢
於晉澤二州亦以一當十助關中軍費又云慶曆末葉
清臣爲三司使與學士張方平等上陝西錢議請以江
南儀商等州大銅錢一當小錢二小鐵錢三當銅錢一

河東小鐵錢如陝西亦以三當一又令陝西大銅錢大
鐵錢皆以一當二王貽上古夫于亭雜錄唐李氏鑄鐵
錢宋太宗始令收民間鐵鑄農器給江北流民復業者
仁宗慶歷初詔江饒池三州鑄鐵錢助陝西經費民苦
之後停罷其患方息黃山谷詩紫稜可劖宜包貢青鐵
無多莫鑄錢蓋謂此也




右皇祐元寶錢宋仁宗鑄文曰皇祐元寶真書案仁宗

慶歷九年己丑改元皇祐宋史食貨志皇祐中饒池建
江韶五州鑄錢百四十六萬緡嘉邛興三州鑄大鐵錢
二十七萬緡董譜吉金所見錄皆不載春草堂錢式圖
有之云此錢與康定二種近世甚稱難得錢志新編載
有篆文者竟未見張端木泉錄仁宗己丑改元皇祐今
未見其錢近時涇縣吳柳門明府有楷書皇祐元寶翰
案仁宗皇祐中五州開鑄凡有四十六萬緡而其錢傳
世獨少未審何故余購求多年僅得楷書一品聞陳式
甫同年收有此錢未識爲楷爲篆錄之以志同好云




右至和元寶錢宋仁宗鑄文曰至和元寶真篆二體案
 仁宗皇祐五年甲午改元至和玉海至和二年詔韶州
 峒水場銅發令漕司益鑄錢





右至和通寶錢宋仁宗鑄文曰至和通寶真篆二體吉

金所見錄至和通寶自上及下讀之翰案和字在下與
 元寶錢和字在右者不同



右至和重寶大錢宋仁宗鑄徑一寸重三錢三分輪郭
 甚潤文曰至和重寶真書自上及下讀背穿上有號字



右至和重寶大鐵錢宋仁宗鑄徑九分重三錢四分形製文字與至和重寶大錢同






右嘉祐元寶錢宋仁宗鑄文曰嘉祐元寶真篆二體宋史仁宗本紀至和三年冬詔改明年元爲嘉祐李燾通鑑長編嘉祐四年以陝西民間多盜鑄大錢於是以現行當三大錢折小銅錢二吉金所見錄嘉祐當三錢今未之見




右嘉祐通寶錢宋仁宗鑄文曰嘉祐通寶真隸篆三體皆自上及下與至和通寶錢式同陸南軒續泉志錢最多者宋仁宗也有楷隸篆三體文字元寶通寶之別春草堂錢式圖有正書嘉祐通寶錢二品云弟二品細審似含八分蓋淳化以後專尚書法雖錢文亦不草草也



右治平元寶錢宋英宗鑄文曰治平元寶真篆二體宋史英宗本紀英宗體乾應歷隆功盛德文肅武睿聖宣孝皇帝諱曙治平元年食貨志至治平中饒池江建韶儀六州鑄錢百七十萬緡



右治平通寶錢宋英宗鑄文曰治平通寶真篆二體篆文各異吉金所見錄治平元寶錢治平通寶錢皆有篆書另體翰案篆書通寶錢一為小篆一為大篆俱平字在下與元寶錢自上而右讀者不同






右熙寧元寶錢宋神宗鑄文曰熙寧元寶真篆二體真書熙字一作熙篆書四品字畫各異宋史神宗紀神宗紹天法古運德建功英文烈武欽仁聖孝皇帝諱頊熙寧元年食貨志京西轉運使吳幾復建議郢唐均房金五州多林木而銅鉛積於淮南若由襄郢轉致郢唐等州置監鑄錢可以抒錢重之弊神宗是之而王安石沮之其議遂寢後乃詔京西淮南兩浙江西荆湖五路各置鑄錢監江西湖南十五萬緡餘路十萬緡爲額仍申熟錢輕重之限又以興國軍睦衡舒鄂惠等州旣置監六通舊十六監水路回遠增提點之官時諸路大率務

於增額詔惠州永通阜民監舊額八十萬至七年增三十萬及折二凡五十萬後衛州黎陽監歲增折二凡五萬緡西京阜財監歲增市易本錢凡十萬緡興州濟衆監歲增七萬二千餘緡陝西三銅錢監各歲增五萬緡而睦州則置神泉徐州則置寶豐梧州以鉛錫易得萬州以多鐵礦皆置監又詔秦鳳等路卽鳳翔府斜谷置監又云商虢洛南增三監耀鄜權置兩監通永興華河中陝舊監爲九以給改鑄又云八年詔河東鑄錢七十萬緡外增鑄小錢三十萬緡翰案宋代鑄錢熙寧最盛故至今流傳甚多





右熙寧元寶背文錢文曰熙寧元寶真書兼篆隸二體
 背穿上有衡字宋史食貨志敘熙寧錢法云又以興國
 軍睦衡舒鄂惠州既置監六通此錢背文衡字爲衡州
 所鑄也





右熙寧重寶大錢宋神宗鑄大者二品皆徑八分半重
 二錢四分次大者二品皆徑八分一重二錢二分一重
 二錢小者徑七分重一錢三分文並曰熙寧重寶前四
 品真篆二體後一品真書字法各異玉海熙寧三年七

月十三日陝西興安置鑄錢監市岑水場銅鉛增鑄百
萬緡六年六月壬辰行折二錢文獻通考熙寧四年陝
西轉運使皮公弼言頃歲西邊用兵始鑄當十錢後兵
罷多盜鑄者乃以當三錢又減作當二行之至今銅費
相當盜鑄衰息請以舊銅鉛鑄當二錢從之折二錢遂
行天下翰案當時所鑄有當十當三當二之別後則併
爲折二故此大小不同也





右熙寧通寶大鐵錢宋神宗鑄徑九分重二錢四分文
曰熙寧通寶真書宋史食貨志初薛向鑄鐵錢於陝西
後許彥先鑄於廣南旣而民不使用神宗欲遂罷之王
安石固爭乃詔京師畿內並罷其行於四方者蓋如故



右元豐通寶錢宋神宗鑄文曰元豐通寶真行篆三體
續資治通鑑綱目戊申神宗皇帝熙寧元年戊午元豐
元年洪邁容齋續筆葉夢得石林燕語並云熙寧末詔

改元執政撰三名以進曰平成曰美成曰豐亨神宗曰成字於文一人負戈美成者犬羊負戈亨字爲子不成不若去亨而加元遂改爲元豐



欽定西清古鑑錢錄神宗朝鼓鑄最繁食貨志言諸路大率務於增額而通考載諸路鑄錢總二十六監每年鑄銅鐵錢五百四十九萬九千二百二十四貫



右元豐通寶大錢宋神宗鑄徑八分重二錢文曰元豐



通寶行篆二體其一背有星點宋史食貨志元豐以後西師大舉邊用匱缺徐州置寶豐下監歲鑄折二錢二十萬緡轉移陝府

欽定西清古鑑錢錄神宗元豐通寶大錢較熙豐大錢略相等



右元豐通寶小錢宋神宗鑄一徑六分半重八分一徑六分重六分文皆曰元豐通寶一真書一篆書吉金所

見錄熙寧十年改次年元爲元豐鑄元豐通寶錢與前熙寧錢近今多而易得大小種種不一蓋神宗朝鼓鑄繁而錢法濫矣





右元豐通寶大鐵錢宋神宗鑄徑九分重三錢文曰元豐通寶行篆二體宋史食貨志熙豐間銅鐵錢嘗並行銅錢千當鐵錢千五百



右元祐通寶錢宋哲宗鑄凡四品其二濶緣文曰元祐通寶皆行篆二體續資治通鑑綱目丙寅哲宗皇帝元祐元年宋史哲宗本紀哲宗憲元繼道顯德定功欽文睿武齊聖昭孝皇帝諱煦神宗第六子也改元元祐又

云元祐八年八月庚午詔陝西復鑄小銅錢







右元祐通寶大錢宋哲宗鑄徑七分半重二錢四分文
曰元祐通寶行篆二體宋史食貨志敘元祐錢法云乃
令折二銅錢寬所行地聽行於陝西一路及河東晉絳
石慈隰州京西西京河陽許汝鄭金房均鄧等州餘路
則禁仍限二年毋更用又云河東安撫提刑司言頃絳
州垣曲縣置監鼓鑄銅錢費且不給今已廢監又禁折

二銅錢不通行非便乃聽行使如舊




欽定西清古鑑錢錄元祐通寶大錢蓋折二錢也



右元祐通寶小錢宋哲宗鑄徑六分重六分文曰元祐
通寶一真書帶行體一篆書帶隸體





右元祐通寶大鐵錢宋哲宗鑄凡二品皆徑九分半一重三錢八分一重三錢五分文皆曰元祐通寶行篆書二體宋史食貨志元祐八年命公私給納貿易並專用鐵錢又云且陝右所用折二鐵錢止當一小銅錢古金所見錄折二鐵錢較銅錢俱大二三分不等自元祐及聖宋皆同



右紹聖元寶錢宋哲宗鑄凡四品其二潤緣文曰紹聖元寶皆行篆二體續資治通鑑綱目甲戌紹聖元年詔改元會布上疏請復先帝政事且云改元以順天意帝從之改元祐九年爲紹聖元年宋史哲宗本紀紹聖元年正月辛丑罷河東大銅錢三年二月癸酉置施州鑄錢廣積監





右紹聖通寶錢宋哲宗鑄文曰紹聖通寶真書自上而下讀之與元寶錢不同董道錢譜紀宋哲宗錢有紹聖元寶紹聖通寶春草堂錢式圖紹聖正書小平錢傳世甚少



右紹聖元寶大錢宋哲宗鑄凡二品一徑八分半重二錢一分一徑八分強重一錢八分文皆曰紹聖元寶行篆二體

欽定西清古鑑錢錄紹聖元寶大錢折二也




右紹聖元寶大鐵錢宋哲宗鑄凡二品皆徑九分重三錢三分文皆曰紹聖元寶行篆二體宋史食貨志紹聖

初銅錢十遂易鐵錢二千五百鐵錢寢輕




右元符通寶錢宋哲宗鑄凡二品文皆曰元符通寶行
篆二體案哲宗紹聖五年戊寅改元元符尹起莘資治
通鑑綱目發明哲宗得咸陽之璽遂有元符之名宋史
食貨志元符二年下陝司諸路撫司博究利害於是詔
陝西悉禁銅錢在民間者令盡送官而官銅悉取就京
西置監




右元符通寶大錢宋哲宗鑄徑八分重二錢二分文曰
元符通寶行篆二體

欽定西清古鑑錢錄元符通寶大錢亦折二也




右元符通寶大鐵錢宋哲宗鑄徑九分重三錢七分文
皆曰元符通寶行篆二體




右聖宋元寶錢宋徽宗鑄文曰聖宋元寶行篆二體宋
史徽宗本紀徽宗體神合道駿烈遜功聖文仁德憲慈
顯孝皇帝諱佖神宗第十一子也食貨志建中靖國元
年陝西轉運副使孫傑以鐵錢多而銅錢少請復鑄銅
錢候銅鐵錢輕重稍均卽聽兼鑄吉金所見錄翁宜泉

曰右行書錢筆法飄逸疑卽御書尙齡按徽宗改元建
中靖國鑄聖宋元寶錢董道錢譜作太祖初鑄者誤朱
多癩古今錢譜聖宋元寶真篆二書宋太祖鑄翰案朱
氏亦承董譜而誤錢文用行體始於太宗淳化御書而
太祖之世無之安可傳會爲說乎




右聖宋元寶大錢宋徽宗鑄凡二品皆徑八分一重二
錢二分一重二錢文皆曰聖宋元寶行篆二體宋史徽

宗本紀崇寧元年十二月庚申鑄當五錢又食貨志會
蔡京當政將以利惑人主託假紹述肆爲紛更有許天
啓者京之黨也時爲陝西轉運副使迎合京意請鑄當
十錢五月始令陝西及江池饒建州以歲所鑄小平錢
增料改鑄當五大銅錢以聖宋通寶爲文
欽定西清古鑑錢錄徽宗聖宋元寶大錢云今所錄二
種皆文曰元寶意當時原有通寶元寶兩品耶翰案建
中靖國四字年號錢文難用故稱聖宋崇寧元年二年
所鑄錢猶用聖宋之文至崇寧三年正月鑄當十大錢
乃改文曰崇寧矣





右聖宋元寶大鐵錢宋徽宗鑄徑九分重三錢五分文
曰聖宋元寶行書宋史食貨志敘建中靖國錢法云繼
而並令舒睦衡鄂錢監用陝西式鑄折十錢限今歲鑄
三十萬緡鐵錢二百萬緡





右崇寧通寶錢宋徽宗鑄文曰崇寧通寶真書續資治通鑑綱目辛巳徽宗建中靖國元年再詔改元曾布主於紹述請改明年元爲崇寧帝從之宋史食貨志崇寧元年戶部尙書吳居厚言江池饒建錢額不敷議減銅增鉛歲可省銅五十餘萬斤增鑄錢十五萬九千餘緡光明堅韌與見行錢不異詔可又云五年兩浙盜鑄尤甚小平錢益少市易濡滯遂命以折五折十上供小平

錢留本路江池饒建韶州錢監歲課以八分鑄小平錢二分鑄當十錢岳珂愧郊錄王應麟玉海並云神宗改元熙寧徽宗改元崇寧皆同劉宋陵名沈作喆寓簡袁文夔牖閒評謂年號最忌與前世諡號陵名相犯熙寧崇寧乃南朝章后宣后陵名亦當時大臣不學之過





右崇寧重寶當十錢宋徽宗鑄徑一寸重三錢文曰崇

○
寧重寶隸書自上及下讀之與通寶錢自上而右讀者
不同宋史徽宗本紀崇寧三年正月戊子鑄當十大錢
食貨志崇寧三年遂罷小平錢及折五錢置監於京城
所復徐州寶豐衛州黎陽監並改鑄折二爲折十張端
義貴耳集崇寧錢上字蔡京書崇字自山字一筆下寧
字去心當時云有意破宗無心寧國翰案崇寧中蔡京
主鑄當十錢則京書當是此品諦觀錢文山字不作一
筆下寧字有心或初鑄時偶一爲之遂貽口實耶




右崇寧重寶當二錢宋徽宗鑄徑七分半重八分文曰
崇寧重寶隸書自上及下讀之與當十錢同宋史食貨
志敘崇寧三年改鑄折十錢下云其公私銅錢兌換運
輸元豐庫仍於涪州置鑄錢監依陝西料例鑄當二錢

右崇寧重寶當五錢宋徽宗鑄徑九分重二錢文曰崇寧重寶隸書宋史食貨志時趙挺之爲門下侍郎繼拜右僕射與蔡京議多不合因極言當十錢不便私鑄寢廣乃令提刑司歲較巡捕官一路所獲多寡繼令福建廣南毋行用第鑄以上供及給他路又云乃命荆湖南北江南東西兩浙並改折十錢爲折五舊折二錢仍舊慮冒法入東北也令以江爲界淮南重寶亦作當五用




右崇寧通寶御書當十錢宋徽宗鑄徑一寸重三錢二分文曰崇寧通寶楷書宋史食貨志崇寧四年立錢綱驗樣法崇寧監以所鑄御書當十錢來上緡用銅九斤七兩有奇鉛半之錫居三之一詔頒其式於諸路令赤仄烏背書畫分明文獻通考錢幣考尙書省言崇寧鑄御書當十錢每貫重一十四斤七兩用銅九斤鉛四斤一十二兩六錢錫一斤九兩二錢去火耗一斤五兩每錢重三錢稗史彙編淳化中太宗始以宸翰爲之崇寧大觀蓋襲故事也陶宗儀書史會要徽宗行草正書筆勢勁逸初學薛稷變其法度自號瘦金體今崇寧大觀

等錢存者尚多殊可寶貴




右崇寧重寶大鐵錢宋徽宗鑄徑九分重二錢八分文
曰崇寧重寶隸書續資治通鑑綱目崇寧四年閏月鑄
夾錫鐵錢



右大觀通寶御書當十錢宋徽宗鑄凡三品皆徑一寸
二分重五錢五分文曰大觀通寶真書一背為花朵一

背文上蛇下龜右劍左星一光幕崇徽宗崇寧八年丁亥改元大觀宋史食貨志大觀元年時蔡京爲相再主用折十錢以京畿錢監所得私錢改鑄尋興復京畿兩監以轉運使宋喬年領之用提舉京畿鑄錢司爲名而喬年鑄烏背漉銅錢頒行諸路




右大觀通寶當二錢宋徽宗鑄徑九分重一錢八分文曰大觀通寶真書李燾資治通鑑長編徽宗大觀元年

詔河北昨鑄夾錫當五錢其樣製大小類當十錢若或行用姦民趨利染爲銅色私作當十難於驗察宜改鑄當二




右大觀通寶小平錢宋徽宗鑄文曰大觀通寶真書宋史食貨志敘大觀元年錢法云京畿既置錢監乃專鑄當十大錢而小平錢則鑄於諸路又云明年江池饒建州錢監自來歲以鑄當十五分鑄小平錢申嚴私鑄之

法又云時蔡京復罷政矣四年詔鼓鑄當十錢多慮法
隨以弊其止鑄舊額小平錢



右大觀通寶大鐵錢宋徽宗鑄徑九分重二錢四分文
曰大觀通寶真書形製字體與銅錢無殊宋史食貨志
大觀四年利州路提刑司言舊銅鐵錢輕重相等等以
大鐵錢一折小銅錢二今大鐵錢五止當一銅錢比舊
輕十倍又流入川界錢輕物重頗類陝西欲將折二大

鐵錢以一折一雖稍減錢數錢必稍重詔許陝西鐵錢
入蜀仍有盡釋其禁且命以今物價量宜裁之




右台鏡大觀通寶錢上有寶蓋蓋上別有鼻穿錢徑一
寸二分通重八錢五分重輪大好文曰大觀通寶背穿

上下有南海二字此品製造甚奇背文南海其佛家用以祈福歟或曰廣州所鑄





右政和通寶錢宋徽宗鑄文曰政和通寶分楷篆書二體案徽宗大觀五年辛卯改元政和宋史食貨志政和元年詔錢重則物輕錢輕則物重其勢然也今諸路所鑄小平錢行之久而無弊多而不壅爲利博矣往歲圖利之臣鼓鑄當十錢苟濟目前不究悠久公私爲害行之幾十年其法日弊而不勝姦滑之民規利冒法消毀當二小平錢所在盜鑄濫錢益多百物增價若不早革卽弊無已時其官私見在當十錢並作當三以爲定制翰案詔以復小平錢爲主當十作當三欲與小平錢相軫不甚低昂爾



右政和通寶當三錢宋徽宗鑄徑八分重一錢八分文曰政和通寶分楷書宋史徽宗本紀政和元年五月戊


辰改當十錢爲當三又食貨志張商英爲相奏言當十錢爲害久矣舊小平錢有出門之禁故四方客旅之貨交易得錢必大半入中末鹽鈔收買告牒而餘錢又流布在市井此上下內外交相養自當十錢行以一夫而負八十千小車載四百千旣爲輕齎之物則告牒爲滯貨鹽鈔非得虛擡之息則不行臣今欲借內庫并密院諸司封樁紬絹金銀并鹽鈔下令折十錢限民半年所在送官十千給銀絹各一匹兩限竟毋更用俟錢入官擇其惡者鑄小平錢存其好者折三行用如此則錢法不相低昂可以復舊翰案當三錢雖以當十折用今見

此品小於折十而大於小平錢蓋當日實鑄有當三也




右政和通寶大錢宋徽宗鑄凡二品皆徑八分一重二錢一重一錢八分文曰政和通寶分楷篆書二體宋史食貨志政和二年蔡京復得政條奏廣惠康賀衡鄂舒州昨鑄夾錫錢精善請復鑄如故廣西湖北淮東如之且命諸路以銅錢監復改鑄夾錫遂以政和錢頒式焉欽定西清古鑑錢錄政和通寶大錢二體按宋食貨志

蔡京主行夾錫錢詔轉運使許天啓推行其法以夾錫錢一折銅錢二會京罷政遂不行政和二年京復相奏昨鑄夾錫錢精善請復鑄如故遂以政和錢頒爲式此錢是也




右政和通寶鐵錢宋徽宗鑄大小二品大者徑九分大強重二錢二分小者徑七分半重一錢其文並曰政和通寶篆書宋史食貨志政和元年錢輕物重細民艱食

詔應陝西舊使鐵錢地名依元豐年間大鐵錢折二公私通行夾錫錢同之母得分別見存鐵錢母改更鑄陝西河東官私折二夾錫錢同之又云尋亦罷行夾錫錢且禁裁物價民商貿易各從其便繼而童貫復請興舊法鐵錢並折二通行




右重和通寶錢宋徽宗鑄文曰重和通寶分楷書案徽宗政和七年戊戌改元重和陸游老學菴筆記政和末


議改元王黼擬用重和既下詔矣范致虛間白上曰此契丹號也故未幾改宣和然重和乃契丹宮殿名猶我之宣德門也年名實重熙後避天祚嫌名追謂重和耳宋史徽宗本紀重和元年十二月戊寅復京西監吉金所見錄按史稱徽宗改元重和僅一年故此品不多見嘉蔭移論泉截句注建中靖國鑄聖宋元寶崇寧大觀政和重和宣和皆御書



右宣和通寶錢宋徽宗鑄文曰宣和通寶分楷篆書二體案重和之次年己亥改元宣和玉海宣和之識為一家有二日果徽欽全帝無名氏談往宣和契丹宮門名徽欽至彼見額而始悔宋史徽宗本紀宣和七年二月田辰復置鑄錢監又食貨志時御府之用日廣東南錢額不敷宣和以後尤甚乃令饒贛錢監鑄小平錢每緡用鐵三兩而倍其銅稍損其鉛










右宣和元寶錢宋徽宗鑄文曰宣和元寶篆書自上而右旋讀吉金所見錄有分楷篆書各一品云徽宗宣和通寶大小錢近今多而易得惟此兩種頗少翰案此品篆法精妙余於青門得之分楷者未見也



右宣和通寶御書錢宋徽宗鑄銅鐵各一品皆徑七分重一錢文曰宣和通寶背穿上有陝字皆真書吉金所見錄宋史宗室子洎請鑄小鐵錢範格以進徽宗悅之


御書宣和通寶為錢文此二品是也翰案此錢以鐵鑄者為主銅鑄者間亦有之故今世所見鐵錢多而銅錢少也





右宣和通寶當一錢宋徽宗鑄凡七品最大者一品徑九分重二錢五分次者二品皆徑八分一重二錢一重一錢八分又次者四品皆徑七分半其二重一錢八分一重一錢六分一重一錢二分文皆曰宣和通寶分楷

篆書一體字畫各異宋書食貨志敘宣和鑄小平錢下云繼而又令江池饒錢監盡以小平錢改鑄當二錢以紓用度



右宣和通寶大鐵錢宋徽宗鑄徑八分強重一錢八分文曰宣和通寶篆書春草堂錢式圖有分楷書一品稱折二鐵錢

右靖康元寶錢宋欽宗鑄文曰靖康元寶篆書宋史欽宗本紀欽宗恭文順德仁孝皇帝諱恆徽宗皇帝長子續資治通鑑綱目丙午欽宗皇帝靖康元年容齋續筆靖康爲立十二月康果在位滿歲而高宗中興錢志新編靖康錢云案此錢製作精好傳世甚少春草堂錢式圖按宋史欽宗卽位丙午至丁未僅一年所鑄靖康錢世不多見



右靖康元寶大錢宋欽宗鑄徑一寸弱重二錢三分文曰靖康元寶分楷書背穿上有月形

欽定西清古鑑錢錄欽宗靖康元寶大錢與徽宗宣和當二錢規製相等春草堂錢式圖載此錢云元字雙挑

紅藕花軒泉品卷九


宋正品下



右建炎通寶錢宋高宗鑄文曰建炎通寶真篆書二體
宋史高宗本紀高宗受命中興全功至德聖神武文昭
仁憲孝皇帝諱構字德基徽宗第九子建炎元年九月
壬辰鑄建炎通寶錢董道錢譜建炎通寶高宗年號又
有建炎元寶建炎重寶

紅藕花軒泉品卷九


欽定西清古鑑錢錄靖康二年康王卽位於南京改元建炎按食貨志建炎經兵鼓鑄皆廢然考本紀建炎元年九月壬辰鑄建炎通寶錢則此錢是也翰案董譜有元寶重寶之文今見小平錢皆通寶



右建炎通寶大錢宋高宗鑄凡二品一徑八分重一錢六分一徑七分半重一錢四分文曰建炎通寶真篆書

一體宋史高宗本紀建炎元年九月庚戌始鑄當三大錢於淮浙荆湖諸路

欽定西清古鑑錢錄按高宗朝只鑄當二及小平錢二種不聞別鑄此大錢意卽當二本紀蓋指先朝大觀等舊錢後改爲當三者非新鑄也




右建炎重寶大錢宋高宗鑄徑九分重一錢八分文曰



建炎重寶篆書董譜載有此品尺度稱兩與通寶大錢相近蓋亦折二也





右紹興元寶錢宋高宗鑄文曰紹興元寶真書好甚大上紹下元二字則潤右興左寶二字則狹在宋錢中爲異續資治通鑑綱目戊申高宗皇帝建炎元年辛亥紹興元年李心傳朝野雜記高宗改元建炎以火德中微故也苗劉之亂以爲炎字乃兩火故多盜賊還自海上

改五年爲紹興元年宋史食貨志紹興初併廣寧監於虔州併永豐監於饒州又云十三年韓球爲使復鑄新錢興廢坑冶又云十五年置利州紹興監鑄錢十萬緡以救錢引二十二年復嘉之豐遠邛之惠民二監鑄小平錢又云二十四年罷鑄錢司歸之漕司二十七年出版漕錢八萬緡爲鑄本權以十五萬緡爲額復饒贛韶鑄錢監又云小平錢千重四斤十三兩








右紹興元寶大錢宋高宗鑄凡四品其二皆徑八分一重一錢六分一重二錢其二皆徑七分半一重一錢八分一重一錢二分文皆曰紹興元寶真篆書二體宋史食貨志紹興二十三年詔利州並鑄折二錢後又鑄折三錢又云每當二錢千重四斤五兩翰案今見此品形製不一徑七分半者皆折二錢其徑八分者蓋折三也



右紹興通寶大錢宋高宗鑄凡二品一徑八分重一錢八分一徑七分半重一錢七分文皆曰紹興通寶真書自上及下讀之案此二品大者亦折三次大者亦折二次也




右紹興通寶大鐵錢宋高宗鑄徑八分半重一錢八分
文曰紹興通寶宋史食貨志紹興九年詔陝西諸路復
行鐵錢





右隆興通寶大錢宋孝宗鑄凡二品一徑八分半重一
錢七分一徑八分重一錢六分文曰隆興元寶真書宋
史孝宗本紀孝宗紹統同道冠德昭功哲文神武明聖
成孝皇帝諱昚字元永太祖七世孫也汪應辰傳孝宗

內禪議改元重熙應辰謂契丹嘗以紀年遂改元隆興
又食貨志孝宗隆興元年詔鑄小平當一錢如紹興之
初董譜隆興通寶孝宗年號翰案今見隆興錢皆大錢
諸譜所載同意史志所云小平當二錢蓋以當二爲小
平錢也




右隆興元寶大鐵錢宋孝宗鑄徑八分重一錢五分文
曰隆興元寶形製與銅錢無異




右乾道元寶大錢宋孝宗鑄凡二品皆徑八分弱一重一錢六分一重一錢五分文曰乾道元寶真篆書二體案孝宗隆興三年乙酉改元乾道樓鑰攻媿集錢端禮行狀上問改元事御筆欲用乾統而北朝曾用別擬四號以進遂改元乾道宋史食貨志乾道六年併鑄錢司歸發運司尋復置八年饒州贛州復各置提點官以新鑄錢殺雜提點鑄錢及永平監官左藏西庫監官戶部

長貳官責降有差九年大江之西及湖廣間多毀錢夾沙泥重鑄號沙尾錢詔嚴禁之文獻通考葉水心曰國初唯要錢好不計工費後世唯欲其富往往減工縮費乾道紹興又不及熙寧遠矣




右乾道元寶大鐵錢宋孝宗鑄徑八分重一錢五分文曰乾道元寶真書宋史食貨志乾道六年詔司農丞許子中往淮西措置於是子中以舒蘄黃皆產鐵請各置

監五謝維新合璧事類乾道初林樞密安宅爲右諫議大夫議以銅錢多入北境請禁之而卽蜀中取鐵錢行之淮上




右淳熙元寶錢宋孝宗鑄文曰淳熙元寶真書背有紀年字或星月文案孝宗乾道十年甲午改元淳熙容齋續筆雲麓漫抄及玉海並云乾道九年冬至郊赦改明年元爲純熙已布告天下後六日又改淳熙或謂出處有告成大武之語故不欲用或謂純旁作屯不宜用宋史食貨志淳熙二年併贛司歸饒州又云淳熙五年詔舒州歲增鑄十萬貫以三十萬貫爲額蘄州增鑄五萬貫以十五萬貫爲額又云八年以舒州水遠薪炭不便減額五萬貫明年又減十萬貫與蘄州並以十五萬貫爲額十年併舒州之宿城監入同安監十二年詔舒蘄

鑄錢並增五萬貫以淳熙通寶爲錢文董譜淳熙元寶
宋孝宗年號錢志新編自淳熙七年始至咸淳錢背上
皆鑄年數如淳熙錢背文七字至十六字又有泉字及
星月文翰案宋志作通寶董譜作元寶今見小平錢皆
元寶其鐵錢有通寶之文



右淳熙元寶大錢宋孝宗鑄皆徑八分重二錢文皆曰
淳熙元寶真書背有紀年字及星月之文與小平錢同
欽定西清古鑑錢錄孝宗淳熙元寶大錢按乾道十二
年改元淳熙本紀淳熙元年十二月罷鐵錢改鑄銅錢
食貨志孝宗隆興元年詔鑄當二小平錢如紹興初注
謂乾道淳熙迄於嘉泰開禧皆如之則此錢實與紹興
折二錢同其背文八字十字十一字十二字十四字十
六字則紀是年所鑄蓋淳熙十六年之次年卽改元紹
熙也至本紀又載六年十月庚申四川行當三錢竟是
別鑄或舊錢只行於蜀耳



右淳熙元寶大鐵錢宋孝宗鑄徑九分重二錢三分文
 曰淳熙元寶真書背文模糊宋史食貨志淳熙十二年
 詔舒蘄鑄鐵錢




右淳熙通寶錢宋孝宗鑄徑七分半重一錢五分文曰

淳熙通寶真書背文模糊翰案此錢通寶與宋志合



右紹熙元寶錢宋光宗鑄文曰紹熙元寶背文有紀年
 字皆真書宋史光宗本紀光宗循道憲仁明功茂德温
 文順武聖哲慈孝皇帝諱惇孝宗第三子也淳熙十六
 年二月壬戌孝宗吉服御紫宸行內禪禮十一月庚午
 詔改明年為紹熙元年又食貨志紹熙二年減蘄春同
 安兩監歲鑄各十萬貫錢志新編按篆文錢自紹熙而

止以後惟用楷書背文自元字至五字翰案吉金所見
錄載紹熙小鐵錢二品一真書一篆書則紹熙錢文猶
有用篆體者紹熙以後乃止爾






右紹熙元寶大鐵錢宋光宗鑄徑九分重三錢文曰紹
熙元寶背文模糊



右紹熙通寶鐵錢宋光宗鑄徑七分重一錢四分文曰
紹熙通寶自上而下讀之與元寶錢不同背文有春二
二字蕪春監之所鑄也



右慶元通寶錢宋寧宗鑄文曰慶元通寶背文有紀年
 字皆真書宋史寧宗本紀寧宗法天備道純德茂功仁
 文哲武聖睿恭孝皇帝諱擴光宗第二子也改元慶元
 食貨志慶元三年復禁銅器期兩月鬻於官每兩三十
 湖州舊鬻監自是官自鑄之錢志新編慶元錢製特精
 妙幕有元字至六字





右慶元通寶當三大錢宋寧宗鑄徑九分重三錢文曰
 慶元通寶背文有紀年字皆真書宋史食貨志紀慶元
 三年錢法云復神泉監以所括銅器鑄當三大錢隸工
 部舊額歲收新錢一百五十貫



右慶元通寶大鐵錢宋寧宗鑄徑九分重二錢一分文
曰慶元通寶真書背文漫滅



右慶元通寶小鐵錢宋寧宗鑄徑七分強重一錢二分
文曰慶元通寶自上及下讀之背有春四二字皆真書




右嘉泰通寶錢宋寧宗鑄文曰嘉泰通寶背有紀年字

皆真書案寧宗慶元七年辛酉改元嘉泰張端義貴耳
集嘉泰之識以為士大皆小人有為者喜董譜載嘉泰

元寶錢志新編載嘉泰通寶錢云背文自元字至四字
止翰案今見嘉泰大小銅錢皆作通寶其作元寶者大


鐵錢也



右嘉泰通寶大錢宋寧宗鑄徑九分重三錢文曰嘉泰通寶真書自上而右環讀之與小平錢自上而下讀者不同

欽定西清古錢錄寧宗嘉泰通寶大錢云此錢蓋當三與慶元當三錢同古金所見錄嘉泰當三錢雖史無明

文近日見者尚多



右嘉泰元寶大鐵錢宋寧宗鑄徑八分半重二錢二分文曰嘉泰元寶真書自上及右環讀之與通寶大銅錢同文作元寶如董譜所載云





右開禧通寶錢宋寧宗鑄文曰開禧通寶背有紀年字
皆真書案寧宗嘉泰五年乙酉改元開禧宋史食貨志
嘉泰三年罷舒斲鼓鑄開禧三年復之董譜開禧元寶
開禧通寶寧宗改元鑄錢志新編背文元字至三字止
又云背有漢二漢三等字春草堂錢式圖按說郭董通
錢譜開禧有元寶通寶兩種元寶未見翰案開禧大小
銅錢皆作通寶董譜作元寶一種謂鐵錢也



右開禧元寶大鐵錢宋寧宗鑄徑九分重二錢二分文
曰開禧元寶真書背文模糊案此品亦折二錢也文爲
元寶與董譜合




右嘉定通寶錢宋寧宗鑄文曰嘉定通寶背有紀年字
皆真書案寧宗開禧四年戊辰改元嘉定董譜載嘉定
元寶錢志新編當三錢與折二錢並行背文自元字至
十七二字止翰案今見小平錢皆作通惟折十錢及鐵
錢作元寶



右嘉定通寶大錢宋寧宗鑄徑八分半重二錢其文曰
嘉定通寶

欽定西清古鑑錢錄嘉定通寶大錢折二錢也




右嘉定元寶折十錢宋寧宗鑄徑一寸四分重一兩四
錢四分文曰嘉定元寶自上而右環讀之背穿上下有
折十二字皆真書錢志新編嘉定折十錢製極精整背
有折十二字諸譜不能俱載蓋此錢傳世絕少不可悉



得也吉金所見錄尙齡按南宋多行折二錢其折三錢
間亦有之亦不多見食貨志云嘉定元年卽利州鑄當
五錢今亦未之見更未聞鑄折十也右錢於己卯春見
於劉青園家其大小同淳祐當百蓋與淳祐俱行之未
久也翰案李心傳朝野雜記嘉定元年陳逢儒總領財
賦患四川錢引增多乃卽利州鑄大錢以權其幣三年
夏制置大使司欲盡收舊引乃又鑄於邛州焉據此則
折十與當五並鑄故稱大錢史志止言利州鑄當五錢
蓋時以當五錢爲主折十錢間有之故弗及也





右嘉定通寶鐵錢宋寧宗鑄徑七分半重一錢六分文
曰嘉定通寶背穿上下有春六二字皆真書此品通寶
文與小平錢同而自上及右讀之與小平錢定字在下
者體式有別




右嘉定元寶鐵錢宋寧宗鑄徑八分半重一錢五分下
半殘缺文曰嘉定元寶真書背文二字穿上一字漫滅
穿下爲伍字宋史食貨志嘉定五年臣僚言江北以銅
錢一折鐵錢四禁之翰案此品背有伍字當是嘉定五
年鑄上一字當是監名



右嘉定之寶鐵錢宋寧宗鑄徑八分重一錢九分文曰
嘉定之寶背漫夷此錢罕觀




右嘉定通寶當三錢宋寧宗鑄徑九分重一錢三分文
曰嘉定通寶真書宋史食貨志嘉定三年制司欲盡收
舊引又於紹興惠民二監鑄三十萬貫料並同當三錢
若四川銅錢吉金所見錄南宋多行折二錢其折三錢
間亦有之亦不多見





右大宋元寶錢宋理宗鑄文曰大宋元寶背有紀年字皆真書宋史理宗本紀理宗建道備德大功復興烈文仁武聖明安孝皇帝諱昀太祖十世孫父希躪追封榮王寶慶元年秋七月乙酉詔行大宋元寶錢又食貨志寶慶元年新鑄錢以大宋元寶為文董譜載大宋通寶錢志新編按背文自元字至三字止翰案瞿中溶續泉志有大宋通寶幕有當十字董譜所稱為通寶者是也

錢志新編云大宋元寶外別有寶慶元寶錢惜皆未見





右紹定通寶錢宋理宗鑄文曰紹定通寶背有紀年字皆真書按理宗寶慶四年戊子改元紹定錢志新編謂紹定錢背文元字至六字止




右紹定通寶大錢宋理宗鑄徑八分重一錢三分文曰
紹定通寶背有紀年字皆真書

錢也
欽定西清古鑑錢錄理宗紹定通寶大錢云此亦折二




右端平通寶大錢宋理宗鑄徑一寸重三錢五分文曰
端平通寶真書光緒續資治通鑑綱目甲午端平元年

欽定西清古鑑錢錄理宗端平通寶大錢按紹定七年
改元端平此錢與嘉泰當三錢同應是當三錢也理宗
朝專措置楮幣而銅冶大衰考本紀端平元年六月癸
巳禁毀銅錢吉金所見錄理宗端平通寶大錢自上及
下讀之



右嘉熙通寶錢宋理宗鑄文曰嘉熙通寶背有紀年字
皆真書案理宗端平五年丁酉改元嘉熙宋史趙興權

傳奏言秦刻頌有端平法度語遂改嘉熙食貨志嘉熙
元年新錢當二并小平錢並以嘉熙通寶爲文當三錢
以重寶爲文董譜有嘉熙元寶錢志新編嘉熙小平錢
當二錢背文自元字至四字止





右嘉熙通寶大錢宋理宗鑄徑八分重一錢五分文曰
嘉熙通寶背有紀年字皆真書吉金所見錄有嘉熙折
二錢翰案此品通寶與宋志所言新錢當二合





右淳祐元寶錢宋理宗鑄文曰淳祐元寶背有紀年字
皆真書案理宗嘉熙五年辛丑改元淳祐宋史理宗本
紀淳祐九年三月以程元鳳爲江淮等路都大提點坑
冶鑄錢公事錢志新編此錢與小平錢折二錢背文自
元字至十二二字止

欽定西清古鑑錢錄淳祐二年詔在外諸軍請給楮幣
權以十八界三分增給又三年命淮東西總所餉軍券

錢並給楮四分則當時楮仍與錢並行特楮賤不得以錢權之故分配支給食貨志謂之品搭是也



右淳祐元寶大錢宋理宗鑄徑八分半重一錢五分文
口淳祐元寶背有紀年字皆真書





右淳祐通寶當百大錢宋理宗鑄徑一寸五分重八錢
文曰淳祐通寶真書背穿上下有當百二字

欽定西清古鑑錢錄錢質厚重過於諸大錢數倍而史
無明文按本紀淳祐九年三月乙酉以程元鳳爲江淮
等路都大提點坑冶鑄錢公事蓋是時所鑄又按淳祐

十二年從監察御史劉元龍言遂令純用楮及至公私
 交弊明年仍用錢會中半則前此所云三分增給與給
 楮四分者又非定額矣賈似道當國主用會子亦曰交
 子後又變而為關子其意在於廢錢用楮故元龍純用
 楮之議顯為迎合然勢雖久行卒不能盡廢圓法也



右皇宋元寶錢宋理宗鑄文曰皇宋元寶背有紀年字
 皆真書案理宗淳祐十三年癸丑改元寶祐宋史食貨
 志寶祐元年新錢以皇宋元寶為文錢志新編此錢背
 文自元字至六字止春草堂錢式圖不曰通寶者不與
 仁宗嘉祐改元皇宋通寶錢混也然仁宗皇宋錢背無
 紀年差可別也





右皇宋元寶大錢宋理宗鑄徑八分半至九分重一錢
 一分至一錢六分不等文曰皇宋元寶背有紀年字皆
 真書

欽定西清古鑑錢錄右皇宋元寶大錢二種微有小大
古金所見錄稱皇宋折二錢



右開慶通寶宋理宗鑄文曰開慶通寶背穿上有元字
皆真書案理宗寶祐七年己未改元開慶宋史理宗本
紀開慶元年正月乙丑行開慶通寶錢董譜有開慶元
寶翰案諸錄載開慶皆通寶其元寶者未見也




右景定元寶宋理宗鑄文曰景定元寶背有紀年字皆



真書案理宗開慶之次年庚申改元景定王圻續文獻

通考景定元年九月詔改鑄新錢以景定元寶爲文又

錢志新編背文自元字至五字止




右景定元寶大錢宋理宗鑄徑八分重二錢二分文曰
景定元寶背有紀年字皆真書吉金所見錄有景定折
二錢自元字至五字止



右咸淳元寶錢宋度宗鑄文曰咸淳元寶背有紀年字

皆真書一品微大光幕宋史度宗本紀度宗端文明武
景孝皇帝諱禔太祖十一世孫父嗣榮王與芮理宗母
弟也續資治通鑑綱目乙丑度宗皇帝咸淳元年錢志
新編背文自元字至十字止



右咸淳元寶大錢宋度宗鑄徑八分重一錢八分及二錢不等文曰咸淳元寶背有紀年字吉金所見錄咸淳折二錢背文自元至七計缺三種



右德祐元寶錢宋恭帝鑄文曰德祐元寶真書宋史瀛國公本紀瀛國公名焜度宗皇帝子也改元德祐清白上集元號略二德祐宋恭懿聖皇帝注端宗遙尊東國史略稱孝恭諸書稱少帝名焜度宗子六歲卽位元兵

入臨安帝出降封瀛國公居燕八年入西城爲僧易名合尊號木波講師後居甘州元英宗時遇害年五十餘錢志新編按度宗後尙有三帝皆度宗之子恭帝一年改元德祐元人劫之北去降封瀛國公端宗二年改元景炎末主二年改元祥興元兵入崖州丞相陸秀夫負帝投海而死宋亡皆未聞鑄錢而方回古今考載有德祐元寶祐元寶今未之見朱多爨古今錢譜亦載有德祐元寶嘉蔭籒論泉截句殘山贖水朝廷小蟋蟀聲催白鴈來元寶僅看存德祐古今著攷有方回

臨安府行用

準參伯文省

右銅銖牌宋代鑄長二寸廣五分半重四錢一分近頂有圓好周郭其質一面文曰臨安府行用一面文曰準參伯文省皆真書孔行書至正直記宋銅銖牌長三寸有奇濶一寸大小各不同背鑄臨安府行用五字面鑄錢貫文曰壹伯文等之類額有小竅貫以致遠最便於民近有人取以爲鑰匙解者亦罕得矣張端木泉錄曾見杭人吳姓有此牌字畫精好顧鎮官續泉志云高宗

鑄其式如古貨布而定枝頂上有穿長二寸許面文曰臨安府行用背文曰準五百文省又一種長濶差減頂無穿面文同背文曰準三百文省尙有一種準二伯文省亦有穿皆高宗行軍缺用鑄此權計一時非常法也故史不著其事李衛西湖外紀銅銖牌今民間亦有藏之者其面鑄臨安府行用背云準五伯文省亦有二伯三伯不等考容齋隨筆太平興國三年詔民間緡錢定七十七爲陌自是以來天下承用公私出納皆然故名省錢以九十九爲一陌者爲長錢南宋定都臨安故鑄臨安府字所謂省者尙存汴京舊制亦可知當時用錢


不能足陌而姑以是濟其乏也郎仁寶七修類稿云是南渡國窮補救變通之物交會錢引之類胡道周續泉志亦載銅牌一徑二寸許厲鶚序謂支錢之券黃模跋此又本前代一刀平五百大泉當千之例而小變之便於齎輕涉遠彼用刀用圓此用牌彼曰平曰當此曰準其制殊其義一也樊榭先生謂爲支錢之券殆非若果以券支不必云準矣金石契載其壹伯貳伯叁伯伍伯凡四品云右宋銅鈔牌杭郡龍泓丁先生嘗居候潮門外掘地得數十枚俱有穿一面臨安府行用五言一面準壹伯文省五言皆正書余每見之大小不一又引金

忠淳曰就今所見皆鑄臨安府行用五字疑屬面文其曰準幾伯文省當作背文試觀淳祐當伯錢卽知孔氏所云背面倒置矣錢志新編附著宋錢後云蓋是宋季國窮補救變通之物云省者乃當時以七十文爲百謂之省錢銅牌爲支錢之券故著省字

欽定西清古鑑錢錄載準參百一品云考元人孔行素至正雜記言南宋有錢牌長三寸有濶一寸今此尺度雖不同然爲錢牌無疑曰省者建炎三年四月正官名台中書省門下省尙書省爲一謂之知三省此蓋三省所鑄也南宋自建都杭州升爲府終南宋一百五十餘

年皆稱臨安府此錢不審爲何時造據此則南宋當二當三當五當百諸大錢而外又有準三百文之錢牌而志傳俱未之錄想未久卽廢罷不行耳今以此牌附於南宋諸品之末可以補舊史之所未備

宋附品



右天盛元寶錢西夏仁宗李仁孝鑄銅鐵各一品皆徑六分重一錢面背肉好周郭文曰天盛元寶真書宋史夏國列傳仁宗崇宗長子又云紹興十七年改元天盛二十八年始立通濟監鑄錢

欽定西清古鑑錢錄西夏仁宗人慶六年改元天盛時則宋高宗之紹興十九年金湯王之天慶元年也春草

堂錢式圖夏錢九品天盛之前有元德通寶大德通寶正德通寶已辨證大德爲元錢元德正德爲日本國錢各詳彼注茲據史傳以天盛爲始



右乾祐元寶鐵錢西夏仁宗李仁孝鑄徑七分弱重一錢面背肉好周郭文曰乾祐元寶真書宋史夏國列傳乾道四年夏改元乾祐又云在位五十五年改元大慶四年人慶五年天盛二十一年乾祐二十四年諡曰聖

德皇帝廟號仁宗吉金所見錄仁宗於天盛二十一年改元乾祐此錢疑其所鑄又按後漢隱帝改元乾祐膳部郎中羅中引請在京置監鑄錢疏奏不報是未嘗鑄錢也此品與天盛一品俱字體精妙質地光明故附於茲春草堂錢式圖亦載此品於夏錢次天盛元寶云世多疑爲五代漢乾祐錢然五代漢所鑄乃漢通元寶翰案唐及五代錢品凡乾字皆作軋茲依正字作乾且筆法迥秀與天盛皇建光定諸錢俱倣宋徽宗御書體其爲西夏錢無疑也




右皇建元寶錢西夏襄宗李安全鑄徑七分重一錢二分面背肉好周郭文曰皇建元寶真書宋史西夏列傳鎮夷郡王安全立安全崇宗之孫越王光仁之子開禧二年正月廢其主純祐自立又云在位六年改元應天四年皇建二年諡曰敬穆皇帝廟號襄宗吉金所見錄桓宗弟安全卽位應天四年改元皇建其元年爲宋寧宗嘉定二年錢志新編襄宗凡五年改元二應天四皇建一所鑄有皇建元寶錢翰案新編說皇建年數二誤爲一與宋史不合






右光定元寶錢西夏神宗李遵頊鑄徑七分重一錢二分面背肉好周郭文曰光定元寶真書宋史西夏列傳遵頊始以宗室策試進士及第爲大都督府主嘉定四年七月三日立時年四十九改元光定錢志新編按續筆乘曰古帝王以科第出身者惟吳大帝權曾舉孝廉

而西夏神宗則以狀元及第更爲稀有今世所見光定元寶錢乃其當時所鑄吉金所見錄此品與皇建元寶文字模範同



右梵字錢西夏國鑄赤銅爲之徑七分重一錢二分面背肉好周郭其文梵書四字不可識洪志外國品有梵字錢云余按此錢徑八分重三銖六參銅色純赤文不可辨大抵類屋馱吐番錢吉金所見錄載西夏梵字錢



劉青園曰涼州土人掘地得古錢數獲其中開元最多北宋遼錢及西夏元德天盛乾祐天慶皇建光定諸品亦復不少而此種梵字錢亦有數品余共檢得千餘枚又嘗於涼州大雲寺訪得古碑陽面正作此等字碑陰楷書拆讀之則爲天祐民安五年所立乃知此錢爲西夏梵書景巖作泉志卽不之識數百年後破此疑竇亦快事也




右阜昌通寶錢偽齊劉豫鑄凡二品皆徑七分重一錢
面背肉好周郭文曰阜昌通寶真篆書二體董譜阜昌
重寶宋高宗四年知濟南府劉豫叛降金金人以山東
河南陝西爲齊國立豫僭號改元阜昌錢志新編按豫
字彥游阜城人宋濟南府太守叛降於金建炎四年七
月金人立豫爲齊帝據都大名府僭元阜昌後徙汴京
盡有梁衛之地爲金人侵寇宋境大爲邊患紹興七年
岳少保用間計使金廢豫爲蜀王至紹興十六年乃死
鑄有阜昌錢二種重寶者楷文元寶者做開元體大小
與宋錢大崇寧同春草堂錢式圖載篆書一品朱多爨

古今錢譜載楷書一品其文並作通寶







Inches 1 2 3 4 5 6 7 8 9 10 11 12 13

Centimetres 1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33

Kodak Color Control Patches

© Kodak, 2007 TM: Kodak

Blue Cyan Green Yellow Red Magenta White 3/Color Black

